

Bulcithoko ke Phine Minás – Zaib-un-Nisa

Iné Bulcithoko nusénin hin biṭánan bam. Íne yuús gucábóma qheéran, háale. Yáṭe tálulo phínan bíma qheéran. Yáṭe phine yuús ke gucábóm sénuman.

Phine yuús ke gucábóm ke yáare Bulcithokoe yuúsmur múl etái. Múl ne muyáare dícase káa yáṭe phine yuúse sénuvo ke “iné Bulcithokoe yuúse muyáartik ayétiṣ qháa ḥór nukóon jáar aar múl díco,” sénuvo, phínar. Śuá nusé es phín díinin ye ṭuun ṭuún étibi. Ése zabáan – phine zabáan – iné biṭáne hénoma qheéran. Et déyalai baré! Déyalinin ke ye es phín sókibi śuá nusén. Ye phín délai Bulcithokoe, nídil múl ḥe asiír ayétai. Múl ḥe asiír ayétase káa ke ye ine ṣicuboma qheér in yuúse.

Et akhóle phúkan qharáṭilá muiíl ḥe – qharáṭasar es phine ité nuká yuús phínmule níbi. Níase káa ine nupáltanin ine eéṣibo, eéṣibi phine yuúse. Ye śí sénase khéene “bée jaa muyáarum isé phúl ḥum ine muiíl ḥe ayétiṣ qháa jáar díco gósabayam, úne muiíl ḥum isé díśáa, jáa eéṣabáa.”

Sénase khéene, “daa béećam” éćam, “áar mooqá atáagurkam – teérum manáam ke mooqá atáagurkam, ye isé díćam, śí!” Sénasar ke ine beeyá nusén nupáltan eéṣiasar ke yáare in déeğasaya qheér Bulcithoko. Déeğasasar daa Bulcithokoe yuúse dáa múl phát éćubóma qheéran – eéṣim. Ye śí sénase khéen “úne jáa ḥe aci ġasuáa daa jáa bés ṣicabáa,” sénase káa. “Gući aqásabaa, ye śí yáye,” sénasar. “Beeyá un jáa ḥe aci nuqás dukóoğasáa,” sénase káa. “Ye yáye śí, žakúun!” Yáṭe íse phine yuúsmur akhí nétaninin, ine Bulcithokoe yuúsmo muyáartik ayétiṣ qháa “íse jáar aar díco,” phínar sénuvom, múyarar.

Es phín díin akhóle teérum mánimi, parwáanan múma, jáa phát ayétam, íse phúl ḥe. Íse ġuiíl ḥe bésan qharáṭiluma qheér, isé ḥubim. Ḥúasar un nupáltalinin eéṣimo. Eéṣiase káa “eeñ, eéṣi” mósimi. Eéṣimo, “beeyá úne jáar íse muyáartik ayétiṣ aticáa,” nusé. Eéṣimo. Eéṣiase káa “dáa béećam, phát ayátasar ye akhí ne dićabayam muiíl ḥum isé,” sénimi. “Íte jáa, íse zabáan hénabáa, phine zabáan jáa hénabáa, jaa ásulo nupál dáağasabayam.” Isée ḥum, “ye ćup ne śí yáye,” sénasar, “śíbo,” nusénin muú ye ġuté ii bilá.